

Orden di Abogado Karel Frielink: “Diversidat ta símbolo di rikesa i no di pobresa”



Written by Journalist

SATURDAY, 25 SEPTEMBER 2010 17:57

WILLEMSTAD – “No tin suficiente kompreheshon pa e hechu e echo ku den un demokrasia no ta trata di mayoria, pero di minoria”.

Asina abogado Karel Frielink, dekano di Orden di Abogado, a bisa durante su diskurso na okashon di instalashon di kuater wes na Korte di Hustisia Antiano/Arubano. “Ku den un demokrasia ta trata di minorianan ta keda demostrá ku e mayoria mes (aktual koalishon) ta konsistí di minorianan. Esaki so ta pidi responsabilidat i toleransha.

E manera ku como gobièrnu ta trata ku minorianan (tambe esnan social-ekonómikamente suak), ta determiná e nivel di kalidat di e demokrasia i sosiedat. Esaki ta nifiká por ehèmpel ku gobièrnu no mester neglishá protekshon di minorianan, spesialmente ora ta trata diskriminashon di religion, konvikshon, koló político, rasa, sekso òf kualke otro base. No ta pòrnada e prohibishon di diskriminashon ta ankrá den artíkulo 1 di Staatsregeling Kòrsou. E gran desafio ku nos ta para su dilanti, ta kon nos ta duna forma huntu na nos sosiedat demokrátko i pluriforme na un manera hustu. Den un sistema demokrátko ta konta tambe ku lidernan, bou di kua tin polítikonan, abogado, fiskal i wesnan mester por wanta krítika”. Frielink ta referí pues di liderazgo ehemplar. Riba esaki el a duna algun insidente resien ku a pone un límite entre derecho i honestidat basáriba relatonan di prensa. El a menshoná e komoshon ku a surgi na Aruba, pasobra un abogado a yama un veredikto ‘rotzooi’, ku a pone wes tèrminá su funshon relashonista públiko di korte i su otro aktividadnan soshal.

Mas aleu Frielink a referí na deklarashon di eks minister Jules Eisden ku a bisa ku e aktual gobernador interino no por keda nombrá den e funshon aki, pasobra e ta kasá ku un ulandes-oropeo. Eisden a bisa tambe ku e aktual gobernador no por keda (re)nombrá, pasobra e no ta Yu di Kòrsou, miéntras Eisden lo a bisa ku e ta stima su propio hendenan mas ku otronan. Otro caso ku Frielink a referí na dje ta deklarashonnan di diputado di Kultura René Rosalia ku a atvertí pa yunan di tera ku ta studia na Ulanda ku por ta un menasa pa nos kultura ora nan distanshá nan mes di nan kultura i bini ku ideanan multikultural. Rosalia a bisa na apertura di Siman di Kulturismo ku nos mester kita di e idea ku nos ta un sosiedat multikultural i ku tin lugá pa tur minoria den nos komunidat.

Pa loke ta trata e veredikto na Aruba, Frielink a bisa ku e abogado por kritiká un veredikto públikamente, pero no por insultá su oponente ku ta e wes. E abogado (Ku ta Dekano di Orden di Abogado na Aruba) mester puntra su mes kiko ta e efekto di su palabranan pa público.

Pa loke ta trata e deklarashonnan di eks-minister minister Jules Eisden, Frielink a bisa ku si Eisden a hasi su komentarionan como un lider ehemplar, e por indiká ku e no ta di acuerdo ku e kriterio pa e nombramentunan, sin deskualifiká e persona públikamente i bisa ku e ta preferá un yu di Kòrsou pa e puesto. "Lugá di nasementu no ta un kriterio, nashonalidat ta e kriterio, segun nos konstitushon", asina Frielink a bisa.

Pa loke ta trata e deklarashonnan di diputado Rosalia, Frielink a remarka ku Kòrsou ta un sosiedat multikultural. "Esei ta un echo, ounke e kultura afro-kurasoleño ta dominante. Ta meskos ku e echo ku 70 pa 75% di nos komunidat ta Katólico. Ku un sosiedat ta konsistí di mas kultura ku ta biba den harmonia banda otro, no mester keda konfundí ku diskushonnan riba integrashon i sigur no asimilashon. No ta gobièrnu ta determiná kua kultura mester t'ei, ni tampoko kua religion òf konvikshon un hende mester sigui. Hasiendo un distinshon entre kurasoleño ku ta kulturalmente bon i otro robes, e diputado ta krea kontradikshonnan innesesario. Diversidat ta símbolo di rikesa, no di pobresa. Pa protekshon di derechinan kultural no tin provishon den Staatsregeling. Si ta skibi klaramente ku gobièrnu mester proveé desaroyo kultural. Prohibishon riba diskriminashon ta apliká tambe riba derechonan kultural, pasobra religion i konvikshon ta mará na kultura. Komo un lider ehemplar por a mustra orguyo i apresio pa propio kultura, dunando rèspèt pa otro kulturanan", asina abogado Frielink a bisa.